

14/2/74

PLEASE DO NOT REMOVE
CARDS OR SLIPS FROM THIS POOL

UNIVERSITY OF TORONTO LIBRARY

DS Yao, P'ei-ch'ien
735 T'ung chien lan yao
A2Y 36
1761
v.7-8

East Asia

正編

卷十


起宋武帝永初二年


卷十一

至隋恭帝義寧元年

通鑑臨要








DS
735

A2Y36

1761

V. 7-8



通鑑要卷十 正編

張景星二銘

雲間

姚培謙平山

同錄

同學沈大成學子參閱

宋紀 姓劉氏都建康凡八君
得年六十。附北朝魏

高祖武帝 諱裕字德興小字寄奴漢高帝
弟楚元王交之後在位三年

辛酉 宋永初二年。是歲西涼亡。冬十一月宋豫章太

通鑑要卷十

南北朝

守謝瞻卒

初宋臺始建瞻爲中書侍郎其弟晦爲
右衛將軍時晦權遇已重自彭城還都
迎家賓客輻輳瞻驚駭謂晦曰汝名位
未多而人歸趣乃爾此豈門戶之福邪
乃以籬隔門庭曰吾不忍見此及宋主
卽位晦以佐命功位任益重瞻愈憂懼
臨終遺晦書曰吾得啓體幸全亦
何所恨弟思自勉勵爲國爲家

壬戌

宋永初三年

夏五月宋主裕殂太子義符

立

少帝

諱義符武帝長子。在位一年。

癸亥

宋主義符景平元年。

冬十一月魏主嗣殂太子

壽立

太祖文帝

諱義隆高祖第三子。在位三十年。

甲子

元嘉元年。○魏太武帝壽始光元年。

夏五月宋徐羨之

傅亮謝晦廢其主義符爲營陽王遷於吳

六月弑之迎宜都王義隆於江陵秋八月

義隆立

義符居喪無禮遊戲無度羨之等召檀道濟王弘入朝謀廢之時義符出於華林園爲列肆親自沽賣與左右卽龍舟而寢道濟引兵入殺二侍者扶義符出收璽綬送故太子宮乃稱皇太后令數義符過惡廢爲營陽王以宜都王義隆纂承大統遷義符於吳弑之

乙丑

二年○夏王薨連昌承光元年

丙寅

三年春正月宋討徐羨之傅亮殺之謝

晦舉兵反江陵

宋主疾羨之亮欲誅二人并召檀道濟欲使討晦侍中王華等皆以爲不可宋主曰道濟止於騁從本非創謀殺害之事又所不關預撫而使之必將無慮道濟至乃下詔暴羨之亮晦罪命道濟以時收翦羨之自經死亮出走被執伏誅晦聞徐傅等已誅奉表稱羨之亮等忠貞橫被冤酷皆王弘王曇首王華陰躁猜忌讒構成禍今當舉兵以誅君側之惡宋主自將討晦殺之

三月宋以謝靈運爲秘書監顏延之爲中

書侍郎

宋主還建康既徵運延之用之又以
慧琳道人善談論因與議朝廷大事遂
叅權要琳者高屐披貂裘置通呈書佐
會稽孔顗曰遂有黑衣宰相可謂冠屨
失所矣○通呈典謁
之職書佐掌書翰

丁卯年冬十一月晉徵士陶潛卒

潛字淵明侃之曾孫也少有高趣博學
不羣爲彭澤令郡遣督郵至縣吏請束
帶見之潛歎曰吾豈能爲五斗米折腰
向鄉里小兒卽日解印綬去賦歸去來

辭著五柳先生傳以自况徵著作郎不就妻翟氏亦與同志能安勤苦夫耕於前妻鋤於後潛自以先世晉輔不復肯仕是歲將復徵之會卒世號靖節先生

○今俸每月米五斗

戊辰

五年○魏神嘉元年○西秦王乞伏慕末永弘元年北凉承玄元年夏主

赫連定勝光元年

己巳

年六冬十月魏以崔浩為撫軍大將軍

魏主嘗指浩以示高車渠帥曰此人廷織懦弱不能彎弓持矛然其胸中所懷

南史

北朝

四

乃過於兵甲

庚午

七年

春三月宋遣將軍到彥之等伐魏

秋七月魏河南諸軍退屯河北彥之等取

河南

彥之自淮入泗沂河西上魏主命悉衆北渡彥之留朱修之守滑臺尹冲守虎牢杜驥守金甌諸軍進屯靈昌津列守南岸至於潼關於是司空亮既平諸軍皆喜王仲德獨有憂色曰諸賢不諳北土情爲必墜其計彼雖仁義不足而凶狡

有餘今歛戍北歸必并力完塞若河
冰既合將復南來豈可不以爲憂乎

八月魏遣將軍安頡擊宋師冬十月宋到
彥之保東平魏攻宋金墉虎牢取之十一
月宋遣將軍檀道濟伐魏彥之棄軍走魏
攻宋滑臺

道濟帥衆伐魏彥之聞洛陽虎牢不守
乃引兵入濟南道濟至歷城叔孫建等
縱輕騎邀其前後焚燒穀草道濟軍乏
食不能進由是頡等得專力攻滑臺克

之道濟等食盡引還魏人追之道濟夜
唱籌量沙以所餘少米覆其上及旦魏
軍見之謂資糧有餘不敢逼道濟全軍而還

辛未

八年○燕王馮弘太興元年北
涼義和元年○是歲秦夏皆亡

壬申

九年○魏
延和元年

癸酉

十年○北涼王沮
渠牧犍永和元年

冬十一月宋謝靈

運有罪誅

靈運好爲山澤之遊窮幽極險從者數
百人伐木開徑百姓驚擾以爲山賊會

舊太守孟顓表其有異志靈運詣闕白
陳宋主以爲臨川內史靈運遊放自若
爲有司所糾遣使收之靈運執使者與
兵逃逸追討擒之宋主愛其才降死徙
廣州或告靈運令人買兵器結健兒欲
於三江口篡取之詔於廣州棄市靈運
恃才放逸多所
陵忽故及於禍

乙亥

十二年○魏
太延元年

丙子

十三年○
是歲燕亡

春三月宋殺其司空檀道

濟

道濟立功前朝威名甚重朝廷疑畏之
收付廷尉并其子植等十一人誅之道
濟見收憤怒目光如炬脫幘投地曰乃
壞汝萬里長城魏人聞之喜曰道濟死
吳子輩不足復憚○
人指宋人曰吳子輩

戊寅年冬十一月宋立四學

宋主雅好藝文使丹陽尹何尚之立玄
學太子率更令何承天立史學司徒參
軍謝元立文學并處士雷次宗儒學爲
四學宋主性仁厚恭儉勤於爲政百官
皆久於其職四境晏安戶口蕃息士敦
操尚鄉耻輕薄江左風俗於斯爲美後

之言政治者皆稱元嘉焉。率吏令東宮官名司刻漏故曰率吏

已卯

十六年。是歲涼亡。

春二月宋以衡陽王義季

都督荆湘等州軍事

義季嘗春月出畋有老父被苦而耕左右斥之老父曰盤於遊畋古人所戒今陽和布氣一日不耕民失其時奈何以從禽之樂而驅斥老農也義季止馬曰賢者也命賜之食辭曰大王不奪農時則境內之民皆飽大王之食老夫何敢獨受大王之賜乎義季問其名不告而退

庚辰

十七年○魏太
平眞君元年

甲申

二十一年

秋八月魏主敗於河西

魏主詔以肥馬給獵騎尚書令古弼留
守悉以弱馬給之魏主大怒欲還臺斬
之弼官屬惶怖恐并坐誅弼曰吾爲人
臣不使人主盤於遊畋其罪小不備不
虞乏軍國之用其罪大今蠕蠕方強南
寇未滅吾爲國遠慮雖死何傷魏主聞
之歎曰有臣如此國之寶也賜衣一襲
他日復敗於山北獲麋鹿數千頭詔尚
書發牛車五百乘以運之旣而謂左右
曰筆公必不與我汝輩不如自以馬遲

之尋果得弼表魏主曰筆公可謂社稷之臣矣弼頌銳故魏主常以筆目之○蠕蠕卽柔然魏太武帝以其無知狀類動蟲故改其號曰蠕蠕

乙酉

二十二年

冬十二月宋太子詹事范曄謀

反伏誅

初魯國孔熙先博學文史兼通數術爲員外散騎侍郎憤憤不得志父默之爲廣州刺史以賊獲罪彭城王義康救解得免及義康遷江州刺史熙先密懷報效且以爲天文圖識宋主必以非道晏駕禍由骨肉而江州應出天子以曄志

意不滿欲引與同謀乃厚結曄甥太子中書舍人謝綜綜引熙先見曄熙先家饒於財數與曄博故爲拙行以物輸之由是情好款洽熙先乃從容說曄弑宋主立義康曄愕然熙先曰丈人雅譽過人讒夫側目久矣比肩競逐庸可遂乎今建大勲奉賢哲圖難於易以安易危豈可棄置而不取哉曄猶疑未決熙先曰又有過於此者愚則未敢道耳曄曰何謂也熙先曰丈人奕葉清通而不得連姻帝室人以犬豕相遇而丈人曾不耻之欲爲之死不亦惑乎曄門無內行故熙先以此激之曄默然不應反意乃決丹陽尹徐湛之及尼法靜皆義康黨

竝與熙先往來法靜妹夫許曜領隊在
臺許爲內應熙先以牋書與義康陳說
圖讖於是密相署置宋主燕武帳岡驍
等謀以其日作亂曜扣刀目驍驍不敢
發湛之恐事不濟密白其謀宋主乃命
有司收付廷尉驍等皆伏誅因廢義康
爲庶人徙安成都○驍曾祖汪
祖寧父泰皆有名行禁中爲臺

丙戌

二十三年

春三月

魏誅沙門

毀佛書佛像

像

魏主與崔浩皆信重道士寇謙之奉其
道浩素不信佛法魏主至長安入佛寺
見大有兵器命有司按誅闔寺沙門閤
其財產大得釀具及窟室婦女浩因說

魏主悉誅境內沙門焚毀經像詔諸寺
佛像胡書皆擊破焚燒沙門無少長悉
阬之

夏六月宋伐林邑尅之

宗慤少時叔父少文問其所志答曰願
乘長風破萬里浪伐林邑慤自奮願行
隨交州刺史檀和之圍區粟城爲賊所
敗慤乃分軍爲數道偃旗潛進攻拔區
粟入象浦林邑王范陽邁傾國來逆以
具裝被象前後無際慤以爲外國有獅
子威服百獸乃製其形與象相禦
象果驚奔衆因此潰亂遂尅林邑

庚寅二十七年夏六月魏殺其司徒崔浩

浩自恃才略及爲魏主所寵任專制朝權中書侍郎高允曰崔公其不免乎魏主使浩允等共譔國記曰務從實錄著作令史閔湛郗標性巧佞勸浩刊所譔國史於石以彰直筆浩竟刊石北人無不忿恚相與譖浩以爲暴揚國惡魏主大怒使有司按浩等初遼東公翟黑子奉使并州受布千疋事覺謀於允允曰公雌幄寵臣有罪首實庶或見原不可重爲欺罔崔鑑謂曰首實罪不可測不如諱之黑子怨允曰君奈何誘人就死地遂不以實對魏主殺之魏主使允授

太子經及浩被收太子召允謂曰吾自導卿至尊有問但依吾語太子入言允小心謹密且制由浩請赦其死魏主問曰國書皆浩所爲乎對曰浩所領事多總裁而已至於著述臣多於浩魏主怒曰允罪甚於浩何以得生太子懼曰天威嚴重允小臣迷亂失次耳臣竊問皆云浩所爲魏主問信如東宮所言乎對曰臣罪當滅族不敢虛妄殿下哀臣欲勾其生耳魏主顧謂太子曰臨死不易辭信也爲臣不欺君貞也遂赦之詔誅浩夷其族他日太子讓允曰吾欲爲卿脫死而卿終不從激怒帝如此每念之使人心悸允曰臣與浩實同其事死生

榮辱義無獨殊違心苟免非臣所願也
太子動容稱嘆允退謂人曰我不奉東
宮指導者恐負翟黑子故
也魏主旣誅浩而悔之

秋七月宋人大舉侵魏

宋主欲伐魏徐湛之江湛王玄謨等竝
勸之沈慶之曰治國譬如治家耕當問
奴織當訪婢陛下今欲伐國而與白面
書生輩謀之事何由濟宋主不從七月
遣玄謨帥慶之等水軍入河進圍滑臺
十月魏主引兵救之衆號百萬玄謨懼
退走魏人追擊
之死者萬餘人

冬十二月魏主引兵南下進次瓜步

魏主引兵至瓜步壞民廬舍及伐葦爲筏聲言欲渡江建康震懼民皆荷擔而立內外戒嚴宋主登石頭城有憂色謂江湛曰檀道濟若在豈使胡馬至此

辛卯

二十八年

春正月魏師還

過彭城宋人追之不及

宋主殺其弟義康

胡誕世反江夏王義恭等奏義康數有怨言搖動民聽故不逞之族因以生心宋主慮不逞之人復奉義康爲亂乃遣中書舍人嚴龍殺之○不逞爲惡者也

二月宋令民遭寇者蠲其稅調

魏人殺掠不可勝計所過郡縣赤地無餘春燕歸巢於林木自是邑里蕭條元嘉之政衰矣

壬辰

二十九年。魏高宗濬興安元年。

春二月魏中常侍

宗愛弒其君靈而立南安王余

冬十月魏宗愛弒其君余魏主濬立討愛

誅之

癸巳

三十一年

春二月宋太子劬弒其君義隆

而自立

夏四月宋江州刺史武陵王駿舉兵討劬

宋人立駿五月劬伏誅

世祖孝武帝

諱駿文帝第三子
在位十一年

甲午

世祖孝建元年
魏興光元年

乙未

二年
太安元年

丙申^三年冬十二月宋金紫光祿大夫顏延

之卒

延之子竣貴重凡所資供一無所受布衣茅屋蕭然如故嘗乘羸牛笨車逢竣鹵簿卽屏在道側常語竣曰吾平生不喜見要人今不幸見汝竣起宅延之謂曰善爲之無令後人笑汝拙也延之嘗早詣竣見賓客盈門竣尚未起延之怒曰汝出糞土之中升雲霞之上遽驕傲如此其能久乎○笨布昆反笨車竹輿也出行儀衛曰鹵簿

丁酉

大明元年

庚子

四年○魏和平元年

甲辰

八年

夏閏五月宋主駿殂太子子業立

前廢帝

諱子業孝武帝長子在位一年

乙巳

廢帝景和元年明帝泰始元年

夏五月魏主濬殂太

子弘立

弘時年十二

馮太后稱制

秋九月宋聽民私鑄錢

沈慶之建議宜聽民鑄錢由是錢貨亂
敗千錢長不盈三寸謂之鵝眼錢劣於
此者謂之絰環錢貫之以縷入水不
沉隨手破碎斗米一萬商貨不行

冬十一月宋主幽其諸父湘東王彧等於

殿內

子業畏忌諸父恐其在外爲患皆拘於
殿內毆捶陵曳無復人理湘東王彧建
安王休仁山陽王休祐年長尤惡之

通鑑纂要

古

朱弒其君子業而立湘東王彧

民間訛言湘中出天子子業將南巡荆湘二州以厭之先欲誅諸叔然後發湘東王與左右阮佃夫王道隆李道兒密結子業左右壽寂之姜產之等謀共廢子業先是子業遊華林園竹林堂使宮人偶相逐一人不從命斬之夜夢在竹林堂有女子罵曰悖虐不道明年不及熟矣戊午夜子業於華林園竹林堂射鬼寂之懷刀直入弒之宣太皇太后令數子業罪惡命湘東王纂承皇極

太宗明帝

諱彧文帝第十子
在位七年

丙午

泰始二年○魏獻文帝弘天安元年

丁未

三年○魏皇興元年

辛亥

七年○魏孝文帝拓跋宏延興元年

秋七月宋以蕭道

成為散騎常侍

道成在軍中久民間或言其有異相宋主疑之徵為黃門侍郎道成懼不欲內遷而無計得畱參軍荀伯玉教其遣數十騎入魏境魏果遣遊騎行境上道成以聞宋主乃使道成復本任至是又徵道成所親以朝廷方誅大臣多勸勿行

道成曰主上自以太子稚弱剪除諸弟何預他人今惟應速發不日見疑且骨肉相殘自非靈長之祚禍難將興方與卿等戮力耳既至拜散騎常侍

八月魏主弘傳位於太子宏自稱太上皇帝

魏主好黃老浮屠之學常有遺世之心乃傳位於宏時宏生五年有至性前年魏主病癰親吮之及是悲泣不自勝魏主問其故對曰代親之感內切於心

壬子

泰豫元年

春二月宋殺其揚州刺史江安

侯王景文

景文常以盛滿爲憂屢辭位宋主不許至是慮晏駕後景文或有異圖遣使齎手敕並藥賜死景文正與客棋叩函看已復置局下神色不變局竟歛子納奩畢徐曰奉敕見賜以死方以敕示客乃作墨啓致謝飲藥而卒

夏四月宋主或殂太子昱立

昱母陳氏嬖人李道兒妾明帝納之故呼昱爲李氏子昱亦自稱李將軍

後廢帝

諱昱明帝長子在位五年

癸丑

元徽元年

甲寅

二年

夏六月魏罷門房之誅

魏太上賞罰嚴明尤重刑罰大刑多令覆鞠或囚繫積年羣臣頗以為言太上曰滯獄誠非善治不猶愈於倉卒而濫乎夫人幽苦則思善故智者以囚圜為福堂朕特苦之欲其改悔而矜恕耳○門房謂一人有罪誅其一門一房也

丙辰

四年○魏承明元年

夏六月魏太后馮氏弑其

主弘復稱制

順帝

諱準明帝第三子。在位三年。

丁巳

順帝昇明元年。魏太和元年。

秋七月宋中領軍蕭

道成弑其主昱而立安成王準自爲司空

錄尚書事

宋主昱嘗直入領軍府道成晝臥裸袒昱令起立畫腹爲的引滿將射之道成歛板曰老臣無罪乃更以匏箭射中其臍投弓大笑道成憂懼密謀廢立命校尉王敬則陰結昱左右楊玉夫楊萬年陳奉伯等使伺機便至是昱乘露車與

左右於臺岡賭跳晚至新安寺偷狗飲
酒醉還玉夫萬年刎其首奉伯袖之稱
敕開門入宮敬則手取白紗帽加道威
首令卽位曰事須及熱道成正色阿之
褚淵曰非蕭公無以了此道成乃下議
迎立安成王遂以太后令數呈罪惡追
廢爲蒼梧王○髑箭
骨鏃箭不能傷人

冬十一月宋中書監袁粲尚書令劉秉謀
誅蕭道成不克而死

粲秉密謀誅道成將帥黃回卜伯興等
皆與通謀時劉韞爲領軍將軍入直門

下省伯興爲直閣回等諸將皆出屯新
亭。粲以謀告褚淵。淵卽以告道成。道成
遣軍主蘇烈、薛淵等助粲守石頭。淵曰
不審公能保袁公共爲一家否。道成曰
所以遣卿正謂能盡臨事之宜。使我無
西顧之憂耳。又以王敬則爲直閣。與伯
興共總禁兵。粲謀竊太后令使勸伯興
帥宿衛兵攻道成於朝堂。回等帥所領
爲應秉等竝赴石頭。本期夜發。秉懼擾
不知所爲。晡後卽束裝盡室奔石頭。粲
驚曰。何事遽來。今敗矣。道成聞之。使敬
則殺勸及伯興。蘇烈等據倉城拒粲。遣
戴僧靜助烈等攻粲。秉踰城走。粲下城
謂其子最曰。本知一木不能止大厦之

崩但以名義至此僧靜踰城獨進最以身衛粲粲謂最曰我不失忠臣汝不失孝子遂父子俱死百姓哀之爲之謠曰可憐石頭城寧爲袁粲死不作褚淵生秉父子亦爲追者所殺回

遂不敢發道成尋殺之

已未

三年齊太祖高帝蕭道成建元元年○是歲宋亡齊代

春三月

宋蕭道成自爲相國封齊公加九錫夏四

月道成自進爵爲王○齊王道成稱皇帝

廢宋主爲汝陰王徙之丹陽

尋弑之滅其族

宋主下詔禪位於齊而不肯臨軒王敬
則勒兵入迎宋主收淚謂曰欲見殺乎
敬則曰出居別宮耳官先取司馬家亦
如此宋主泣而彈指曰願後身世世勿
復生天王家是日侍中謝朓在直當解
璽綬陽爲不知曰有何公事傳詔云解
璽綬授齊王朓曰齊自應有侍中乃引
枕臥傳詔懼使朓稱疾朓曰我無疾何
所道遂朝服步出乃以王儉爲侍中解
璽綬禮畢宋主出就東邸光祿大夫王
琨在晉世已爲郎中至是攀車慟哭曰
人以壽爲懽老臣以壽爲戚旣不能先
驅螻蟻乃復頻見此事嗚咽不自勝百
官雨泣司空褚淵等奉璽綬詣齊宮勸

進淵從弟炤謂淵子賁曰不知汝家司
空將一家物與一家亦復何謂齊王卽
皇帝位以淵爲司徒賁者滿座炤歎曰
彥回少立名行何意披猖至此門戶不
幸乃復有今日之拜使彥回作中書郎
而死不當爲一名士耶名德不昌乃復
有期頤之壽淵固辭不拜世子贖請殺
肅齊主曰殺之遂成其名正應容之度
外耳○天

子曰官家

齊紀

姓蕭氏都建康凡七君得
年二十有四○附北朝魏

太祖高帝

諱道成字紹伯漢
蕭何後在位四年

庚申

建元二年

冬十二月齊以褚淵為司徒

淵入朝以腰扇障日征虜功曹劉祥曰作如此舉止羞面見人扇障何益淵曰寒士不遜祥曰不能殺袁劉安得免寒士○袁袁粲劉劉秉

壬戌

四年

春三月齊主道成殂太子蹟立

齊主沈深有大量博學能文性清儉主衣中有玉導曰畱此正長病源即命擊碎每日使我治天下十年當使黃金與土同價○主衣車中也導笄屬以玉為之猶冠簪也

通鑑纂要卷十
三
秋魏以李崇爲荊州刺史

魏以荊州巴氏擾亂以崇爲刺史發兵
送之崇辭曰邊人失和本怨刺史今奉
詔代之自然安靖不煩發兵自防使之
懷懼也遂輕將數十騎馳至上洛宣詔
慰諭民夷帖然徙兖州刺史兖土舊多
劫盜崇命村置一樓樓皆懸鼓盜發之
處亂擊之旁村始聞者以一擊爲節次
二次三俄頃之間聲布百里皆發人守
險由是盜無不
獲諸州皆效之

世祖武帝

諱贖字宣遠高帝
太子在位十一年

癸亥

武帝永
明元年

甲子

年二春正月齊以竟陵王子良爲司徒

子良齊主之子也少有清尚傾意賓客
開西邸多聚古人器服以充之范雲蕭
琛任昉主融蕭衍謝朓沈約陸倕並以
文學見親號曰八友柳惔主僧孺江革
范縝孔休源亦預焉衍好籌略有文武
才幹王儉深器之曰蕭郎出三十貴不
可言

冬十月齊以長沙王晃爲中書監

初太祖臨終以見屬齊主使處輦下近藩勿令遠出且曰宋氏若非骨肉相殘他族豈得乘其弊汝深誠之舊制諸王在都唯得置捉刀四十人至是是自南徐刺史罷還私載數百人仗齊主聞之大怒將糾以法豫章王嶷叩頭流涕曰晃異誠不足宥陛下當憶先朝齊主垂泣而罷然終不被親寵武陵王曄亦無寵嘗侍宴醉伏地貂抄肉梔帝笑曰肉汙貂對曰陛下愛羽毛而疎骨肉帝不悅○晃太祖子捉執也捉刀執刀戟爲儀仗之人侍中中常冠以貂尾爲飾抄略拂過也梓與槃通

乙丑年夏五月齊以王儉領國子祭酒

自宋世祖好文章士大夫無專經者儉少好禮學及春秋言論造次必於儒者由是衣冠翕然更尚儒術儉當朝理事斷決如流十日一還學監試諸生作解散髻斜插簪朝野多慕效之儉嘗謂人曰江左風流宰相唯有謝安意以自比也齊主深委仗之士流選用奏無不可

冬十月魏詔均田

給事中李安世上言田業多爲豪右所占奪雖桑井難復宜更均量使力業相

稱又所爭之田宜限年斷事久難明悉
歸今主魏主善之由是始議均田詔諸
男夫十五以上受露田四十畝婦人二
十畝奴婢依良丁牛一頭受田三十畝
限止四牛所授之田率倍之三易之田
再倍之諸宰民之官各隨近給田有差
更代相付○露田不栽樹者良丁謂良
人成丁者不易之地歲歲可種是為上
田一易之地兩歲一種是為中田
再易之地三歲一種是為下田

巳巳年冬十二月齊以江斆為都官尚書

中書舍人紀僧真得幸於齊主請曰臣
出自武吏階榮至此無復所須惟就陞

下乞作士大夫齊主曰此由江敦謝淪
可自詣之僧真詣敦登榻坐定敦顧左
右曰移吾牀遠客僧真喪氣而退
告齊主曰士大夫故非天子所命

壬申

年

冬齊詔

太子家令

沈約撰

宋書

約撰宋書疑立袁粲傳齊主曰粲自是
宋室忠臣約多載宋世祖太宗諸鄙瀆
事齊主曰孝武事迹不容頓爾我昔經
事明帝卿可思諱惡之義故多所刪除

癸酉

年

春正月

齊以陳

顯達爲

江州刺

史

顯達自以門寒位重常有愧懼之色戒其子勿以富貴陵人而諸子多事豪侈顯達曰墜尾蠅拂是王謝家物汝不須捉此取而燒之

秋七月齊主賸殂太孫昭業立

廢帝鬱林王

諱昭業太子長懋長子在位一年

八月以竟陵王子良爲太傅蕭鸞爲尚書

令

中書郎王融自恃人地三十內望爲公輔嘗夜直省中撫案歎曰爲爾寂寂鄧

禹笑人行逢朱雀柏開喧嗽不得進槌
車壁歎曰車前無八騶何得稱丈夫子
良愛其文學特親厚之齊主疾亟薨絕
太孫未入融欲矯詔立子良詔草已立
會太孫來融我服絳衫於中書省閣口
斷其仗不得進頃之齊主復蘇召太孫
入以朝事委西昌侯鸞而歿融以子良
兵禁諸門鸞排之而入奉太孫登殿命
左右扶出子良融知不遂釋服還省歎
曰公誤我矣太孫立十餘日收融賜死
子良尋
以憂卒

冬十月魏營洛都

通鑑纂要卷

南北朝

五

甲戌

昭業隆昌元年昭文延興元年鸞建武元年

秋七月齊肅

鸞弒其君昭業而立新安王昭文自爲驃

騎大將軍錄尚書事封宣城公

以太后令追廢

昭業爲鬱林王

廢帝海陵恭王

諱昭文太子長懋第二子在位四月

冬十月齊宣城公鸞自爲大傅揚州牧進

爵爲王

齊宣城王鸞廢其主昭文為海陵王而自

立之尋弒

高宗明帝名鸞高帝兄道生子在位五年

乙亥建武二年夏六月魏求遺書

魏主好讀書手不釋卷在輿據鞍不忘講道又好賢樂善所與遊接常寄以布素之意制禮作樂鬱然可觀有太平之風焉

丙子三年春正月魏改姓元氏

魏主下詔以爲北人謂土爲拓后爲跋
魏之先出於黃帝以土德主故爲拓跋
氏夫土者黃中之色萬
物之元也宜改姓元氏

戊寅

永泰元年

秋七月

齊主鸞殂

太子寶卷立

立

寶卷卽位惡靈輒在太極殿欲速葬徐
孝嗣固爭得踰月每當哭輒云喉痛太
中大夫羊闇入臨無髮俯仰憤脫寶卷
輟哭大笑曰秃鶩啼來乎○秃鶩以闇
頭秃而
頸長也

廢帝東昏侯

諱寶卷明帝第二子在位二年

齊主自在東宮嬉戲無度及卽位不與朝士相接專親信宦官左右是時揚州刺史始安王遙光尚書令徐孝嗣右僕射江祏右將軍蕭坦之侍中江祀衛尉劉暄更直內省所謂六貴又有御刀茹法珍梅蟲兒豐通等八人號爲八要蕭衍曰政出多門亂其階矣乃密修武備招聚驍勇以萬數

巳卯

寶卷永元元年

夏四月

魏主宏殂太子恪立

庚辰

二年○魏宣武帝恪景明元年

秋八月齊後宮火

時嬖倖之徒皆號爲鬼有趙鬼者能讀西京賦言於齊主曰柏梁旣災建章是

營齊主乃大起芳樂主壽等諸殿以麝
塗壁刻畫裝飾窮極綺麗後宮服御極
選珍奇鑿金爲蓮花以帖地令潘妃行
其上曰此步步生蓮花也○漢武太初
元年柏梁臺災
遂作建章宮

冬十月齊主殺其尚書令蕭懿

時懿爲尚書令弟暢爲衛尉掌管籥時
齊主出入無度或勸懿因其出門舉兵
廢之懿不聽嬖臣茹法珍等憚懿說齊
主曰懿將行隆昌故事齊主然之賜懿
藥於省中懿且死曰家
弟在雍深爲朝廷憂之

十一月齊雍州刺史蕭衍起兵襄陽行荊
州事蕭穎胄亦以南康王寶融起兵江陵
衍聞懿死集僚佐謂曰昏主暴虐當與
卿等共除之時寶融爲荊州刺史穎胄
行府州事齊主遣將軍劉山陽就穎胄
兵襲襄陽衍知其謀遣將軍王天虎詣
江陵編與府州書聲云山陽西上并襲
荆雍穎胄大懼夜呼參軍席闡文柳忱
定議闡文曰蕭雍州蓄養士馬非復一
日今若殺山陽與雍州舉事立天子以
令諸侯則霸業成矣穎胄從其計伏兵
斬山陽乃以寶融教纂嚴以衍都督前

北齊書卷之十一

鋒穎胃都督行留諸軍事移檄建康州郡數齊主及梅蟲兒等罪惡○雍州今

襄陽府纂嚴纂集兵嚴也

和帝

諱寶融明帝第八子在位一年

辛巳

寶融中興元年

春正月齊南康王寶融稱相

國蕭衍發襄陽

三月齊相國南康王寶融廢其君寶卷為

涪陵王而自立

即位江陵

冬十月齊蕭衍圍建康。十二月齊人弒涪陵王寶卷。蕭衍入建康。以太后令追廢寶卷爲東昏侯。自爲大司馬承制。

梁紀

姓蕭氏。齊之疎族。都建康。凡四君。得年五十有四。○附魏

高祖武帝

諱衍。字叔達。在位四十八年。

壬午

天監元年

春二月。衍自爲相國。封梁公。加

九錫。

初衍與范雲沈約任昉同在竟陵王西邸至是引雲爲諮議約爲司馬昉爲記室叅謀議衍內有受禪之志約曰齊祚已終明公當承其運衍然之召雲等告之雲對略同約旨衍曰卿明早將休文更來雲出語約約曰卿必待我雲許諾而約先期入衍命草具其事約乃出懷中詔書有頃衍召雲入曰我起兵三年諸將不爲無功然成帝業者卿二人也乃詔進衍位相國封梁公衍以約爲僕射雲爲侍中

○約字休文

梁公衍自進爵爲王

夏四月梁王衍稱皇帝廢齊主爲巴陵王

尋弒之

癸未二年冬十月梁吉玠請代父死梁主赦

之

玠父爲令爲姦吏所誣罪當死玠年十五乞代父命梁主疑人教之使廷尉卿蔡法度訊之玠曰因雖愚幼豈不知死之可憚顧不忍見父極刑故求代之法度以聞乃宥其父罪丹陽尹王志欲舉充純孝玠曰異哉王尹何量玠之薄乎

父辱子死道固當然若玃當此舉乃是因父取名何辱如之固拒而止

甲申
三年○魏
正始元年

丁亥
六年冬十月梁以徐勉爲吏部尚書

勉嘗與門人夜集客求官勉正色曰今夕止可談風月不可及公事

戊子
七年○魏
永平元年

壬辰
十一年○魏
延昌元年

乙未
十四年春正月魏主恪殂太子詡立

丙申

十五年。魏明帝詡熙平元年。

丁酉

十六年。

夏四月梁罷宗廟牲牢薦以蔬

果

詔宗廟牲牢皆以麴爲之於是朝野喧譁以爲宗廟去牲乃是不復血食梁主

竟不

從

戊戌

十七年。魏神龜元年。

己亥

十八年。

春二月魏以崔亮爲吏部尚書

立停年格

時官員既少應選者多亮為格制不問士之賢愚專以停解日月為斷洛陽令薛琬上書曰黎元之命繫於長吏若選曹唯取年勞不簡賢否執簿呼名一吏足矣數人而用何謂銓衡書奏不報魏之選舉失人自亮始○銓衡量度人物而為之平也

庚子

普通元年○
魏正光元年

乙巳

六年○
魏孝昌元年

丁未

大通元年

戊申

二年。○魏武泰元年。莊帝子攸永安元年。

春正月魏太后

胡氏進毒弑其主詔而立臨洮王世子釗。

三月魏車騎將軍六州大都督爾朱榮舉

兵晉陽夏四月至河陽立長樂王子攸而

沈太后胡氏及幼主釗於河殺王公以下

二千人自爲都督中外諸軍事封太原王

遂入洛陽北海王顥出奔梁五月爾朱榮還晉陽

冬十月梁立元顥爲魏王遣將軍陳慶之將兵納之

巳酉

中大通元年

夏四月魏王顥拔滎城稱皇

帝。五月魏主子攸奔河內顥入洛陽以陳慶之爲車騎大將軍。閏六月魏爾朱

榮渡河魏王顥走死陳慶之走歸梁魏主
子攸歸洛陽榮自爲天柱大將軍

秋九月梁主捨身於同泰寺

梁主幸同泰寺設大會釋御服持法衣
行清淨大捨素牀瓦器見爲四衆講涅槃經羣臣以錢一億萬奉贖表請還宮
三請乃許○四衆比丘邱尼優婆塞
優婆夷也

庚戌二年○魏主秋九月魏爾朱榮伏誅

曄建明元年

南北朝

通鑑纂要卷之

榮雖居外藩遙制朝政魏主恒怏怏不
樂城陽王徽侍中李弼勸魏主除榮魏
主疑未定而謀頗泄爾朱世隆疑有變
乃爲匿名書云天子欲殺天柱取以白
榮榮恃強不以爲意九月至洛陽魏主
伏兵斬之世隆帥榮部曲走屯河陰

魏僕射爾朱世隆反與汾州刺史爾朱兆

立長廣王曄於長子冬十二月入洛陽遷

其主子攸於晉陽而弑之

長子縣今屬山西潞安府

魏紇豆陵步藩大破爾朱兆於秀容兆及

晉州刺史高歡擊殺之兆使歡統六鎮

慕容紹宗諫曰高公雄才蓋世復使握大兵於外譬如借蛟龍以雲雨將不可制矣兆曰有香火重誓何慮邪紹宗曰親兄弟尚不可信何論香火時兆左右已受歡金因稱紹宗與歡有隙兆怒四紹宗趣歡發歡道逢爾朱榮妻北鄉長公主自洛陽來有馬三百匹盡奪之兆聞之乃釋紹宗

辛亥

三年○魏節閔帝恭普泰元年朔中興元年

春二月魏樂

平王爾朱世隆廢其主暉而立廣陵王恭

尋封肅為東海王
後魏主脩弑之

夏四月梁太子統卒

梁主使統省萬機辨析謬誤徐令改正
未嘗彈糾一人平斷法獄多所全宥好
讀書屬文引接才俊不蓄聲樂天性孝
謹在東宮坐起恒西向母丁貴嬪卒水
漿不入口腰帶十圍減削過半及寢疾
恐貽梁主憂敕參問輒自力手書啓及
卒朝野惋愕
諡曰昭明

魏冀州刺史高歡起兵討爾朱氏

冬十一月魏高歡立渤海太守元朗自爲丞相敗爾朱兆等軍於廣阿

壬子

四年○魏武帝修永熙元年

春三月魏主朗入居

於鄴夏四月高歡入洛陽廢其主恭及朗

而立平陽王修自爲大丞相

魏主修尋弒恭及朗

秋七月魏大丞相高歡討爾朱兆走之遂

據晉陽

兆走秀容歡襲殺之

甲寅

六年○東魏孝靜帝善見天平元年是歲魏分爲二

秋七月魏

主修奔長安高歡入洛陽推清和王亶承

制決事魏主以宇文泰爲大將軍尚書令

尋進大丞相

王思政言於魏主曰歡之心昭然可知洛陽非用武之地泰乃心王室今往就之還復舊京何慮不克魏主遂入長安歡乃立清河王世子善見於洛陽是爲

東魏尋遷於鄴

冬閏十二月魏大丞相泰進毒弑其君脩

乙卯大同元年○魏文帝寶炬大統元年春正月朔魏大丞

相泰立南陽王寶炬

冬十一月東魏封高洋爲太原公

洋歡之子也歡謂長史薛琠曰此兒識慮過吾幼時歡嘗欲觀諸子意識使各治亂絲洋獨抽刀斬之曰亂者必斬

丙辰二年春三月梁處士陶弘景卒

弘景博學好養生仕齊為奉朝請棄官
隱居茅山梁主屢以千敕招之弘景不
出國家每有大議必先諮
之時人謂之山中宰相

戊午

四年○東魏
元象元年

已未

五年○東魏
興和元年

辛酉

七年

秋九月魏省官員置屯田頒六條

宇文泰欲革時政為疆國富民之法度
支尚書蘇綽贊成其事減官員置二長
并置屯田以資軍國又為六條詔書一
曰清心二曰敦教化三曰盡地利四曰

擢賢良五日恤獄訟六日均賦役
泰常置諸坐右令百司習誦之

壬戌年八秋八月東魏以侯景爲河南大行

臺

癸亥九年○東魏
武定元年

乙丑年十一冬梁散騎常侍賀琛上書論事

琛啓陳四事一日牧守貪殘二日風俗
侈靡三日斗筭競進四日省事息費梁
主詰責琛謝過不敢復言梁主勤於政
務冬月視事執筆觸寒手爲皴裂自天

通鑑纂要

監中用釋氏法長齋一食惟菜羹糲飯而已身衣布衣木綿皂帳一冠三載一衾二年雖居暗室恒理衣冠小坐盛暑未嘗褰袒對內監小臣如遇大賓然優假士人太過牧守多侵漁百姓又好親任小人頗傷苛察多造塔廟公私費損年老又持佛戒每斷重罪則終日不憚或謀反逆事覺亦泣而宥之由是王侯益橫或白晝殺人暮夜剽掠梁主深知其弊而溺於慈愛不能禁也

丙寅

中大同元年

丁卯

太清元年

春正月東魏大丞相渤海王高

歡卒

歡病篤謂子澄曰侯景專制河南十四年矣常有飛揚跋扈之志顧我能畜養非汝所能駕御也堪敵景者唯有慕容紹宗我故不貴之畱以遺汝○紹宗太原王恪之後也

東魏大行臺侯景以河南降魏

景右足偏短弓馬非其長而多謀算嘗言於高歡願得兵三萬橫行天下要須濟江縛取蕭衍老公以爲太平寺主歡使將兵十萬專制河南景素輕高澄嘗

通鑑纂要
三
曰高王在吾不敢有異王沒吾不能與
鮮卑小兒共事矣及歡卒遂以河南降
魏魏以景爲太傅大行臺○
鮮卑東胡種名景以喻高洋

二月侯景復以河南叛附於梁梁封景爲 河南王遣兵援之

景請舉河南十三州內附梁主召羣臣
廷議僕射謝舉等曰頃與魏和邊境無
事今納其叛臣非宜梁主曰得景則塞
北可清機會難得然意猶未決嘗獨言
我國家如金甌無一傷缺今忽受景地
詎是事宜脫致紛紜悔之何及中領軍

朱异勸納之乃以景爲大將軍封河南王平西諮議周弘正聞納景曰亂階在此矣

秋七月梁遣貞陽侯淵明督諸將侵東魏

東魏慕容紹宗擊敗之獲淵明

東魏大將軍澄入鄴幽其主於宮中

戊辰二年春正月東魏慕容紹宗擊侯景

衆潰走襲據壽春梁以爲南豫州牧

光祿大夫蕭介諫曰侯景以凶狡之才荷高歡卵翼之遇歡墳土未乾卽還反噬之力不逮乃復逃死關西宇文不容故復投身於我陛下前者所以受之正欲比屬國降胡冀獲一戰之效耳今既亡師失地直是境上之匹夫陛下愛匹夫而棄與國臣竊不取若猶待其歲暮之效則彼棄鄉國如脫屣背君親如遺芥豈知遠慕聖德爲江淮之純臣乎梁主不能用

二月東魏求成於梁秋八月侯景反壽陽

高澄遣書求好於梁朱异等皆以爲便司農卿傅岐獨曰此澄設間欲令侯景

自疑而作亂耳。若許通好，正墮其計。昇等固執宜和。梁主許之，使還過壽陽。景知之，攝問具服，乃詐爲鄴中書，求以淵明、易、景、梁主復書曰：「貞陽旦至，侯景夕還。」景謂左右曰：「我固知吳老公薄心腸，於是始爲反計。」景知臨賀王正德屢以貪暴得罪，陰養死士。幸國家有變，遣徐思玉致牋自效。正德大喜，景遂反於壽陽。以誅朱昇等爲名，昇等皆以姦佞驕貪蔽主，弄權爲時人所疾。故景託以興兵。梁主詔邵陵王綸督衆軍以討景。正德引景兵以渡江，圍臺城，乘勝至闕下。正德卽位，以景爲丞相。

正德臨川靖惠王第三子

通鑑纂要

己巳年春三月侯景陷梁臺城自稱大都

督錄尚書事廢蕭正德以爲大司馬

尋弒之

景攻臺城陷之梁主安臥不動歎曰自我得之自我失之亦復何恨景入見於太極東堂以甲士自衛稽顙殿下典儀引就三公榻梁主神色不變問曰卿在軍中日久無乃爲勞景不敢仰視汗流被面退曰吾嘗跨鞍對陳矢石交下而意氣安緩了無怖心今見蕭公使人自懼豈非天威難犯吾不可以再見之

夏五月梁主衍殂太子綱立

梁主爲侯景所制。飲膳亦爲所裁節。憂憤成疾。口苦索蜜。不得。再曰。荷荷。遂殂。太子卽位。荷荷猶云。阿阿。怨怒聲也。

秋七月盜殺東魏大將軍渤海王高澄於

鄴

澄以其弟太原公洋次長。忌之。洋深自晦匿。澄獲衡州刺史蘭欽子京。以爲膳奴。京屢自訴。澄杖之曰。更訴當殺汝。京與其黨謀作亂。進食置刀盤下。殺之。洋聞之。神色不變。入討羣賊。斬而櫛之。秘不發喪。勲貴以重兵皆在并州。勸洋早

如晉陽洋從之乃入謁東魏主從甲士
八千人登階者二百餘人皆攘袂扣刃
若對嚴敵令主者傳奏曰臣有家事須
詣晉陽再拜而出東魏主失色目送之
曰此人又似不相容朕不知死在何日
晉陽舊臣宿將素輕洋及至大會文武
神彩英暢言辭敏洽衆皆
大驚○主者主朝儀者也

冬十二月梁始興太守陳霸先起兵討侯

景

太宗簡文帝

諱綱武帝第三子昭明
太子母弟也在位二年

庚午

大寶元年○齊文宣帝高洋天保元年○是歲東魏亡齊代

春正

月東魏高洋自爲丞相都督中外諸軍錄

尚書事封齊王

夏五月齊王洋稱皇帝廢東魏主爲中山

王

後弑之

魏立蕭簪爲梁王

簪武帝孫昭明太子統之第三子也

秋九月侯景自稱漢王

通鑑纂要卷一

又自加宇宙大將軍都督六合諸軍事梁主鸞曰將軍乃有宇宙之號乎

冬十月魏初作府兵

宇文泰籍民之才力者爲府兵身租庸調一切蠲之以農隙講閱戰陳馬蓄糧備六家供之合爲百府每府一將主之分屬二十四軍凡十二大將軍每大將軍各統開府二人開府各領一軍○唐書有田則有租有身則有庸有戶則有調

辛未年春三月魏主寶炬殂太子欽立秋

八月侯景廢梁主綱殺太子大器而立豫

章王棟

棟昭明太子孫豫章王歡子

冬十月侯景弑梁主綱廢梁主棟自稱漢

帝

棟尋爲湘東王繹所殺

世祖孝元帝

諱繹武帝第七子在位三年

壬申

承聖元年○魏主欽元年

春二月梁湘東王繹遣

王僧辯陳霸先討侯景

夏四月梁武陵王紀稱帝於成都紀高祖第八子

僭號於蜀
改年天正

侯景伏誅

景敗走吳將入海將軍羊侃之子鴟為
景都督殺之送尸建康傳首江陵截其
手送於齊暴景尸於市士
民爭取食之并骨皆盡

冬十一月梁主繹立卽位江陵

癸酉二年春三月梁武陵王紀伐江陵魏遣

大將軍尉遲廻伐成都以救之

武陵王紀帥諸軍東下梁主甚懼與魏書請救宇文泰曰取蜀制梁在此一舉乃遣廻自散關伐蜀紀還兵至西陵與魏師相拒兵敗被殺成都降魏

甲戌

三年○魏恭帝廓元年

春正月魏宇文泰廢其

主欽而立齊王廓復姓拓拔氏

泰尋弑欽

三月齊主殺其尚書左丞盧斐李庶

齊中書令魏收撰魏書頗用愛憎為褒貶每謂人曰何物小子敢與魏收作色

舉之則升天。按之則入地。既成斐庶。皆言其誣罔不直。收唐齊主云。臣既結怨強宗。將爲刺客所殺。齊主怒。於是斐庶皆坐謗史。繫獄死。然時人終不服謂之穢史。

冬十月魏遣柱國于謹帥師伐梁。十一月入江陵。十二月執梁主繹殺之。

謹至樊。鄧梁王警帥衆會之。梁主尚講老子。百官戎服以聽。魏軍至柵下。築長圍。梁主巡城。猶口占爲詩。羣臣亦有和者。城陷。梁主乃焚古今圖書十四萬卷。

歎曰文武之道今夜盡矣或問何意焚書梁主曰讀書萬卷猶有今日故焚之

○樊城名

鄧州名

魏取襄陽徙梁王督使稱帝於江陵屯兵

守之

初魏師未還督將尹德毅說督曰魏之精銳盡萃於此若殿下爲設享會預伏武士因而斃之收江陵百姓撫而安之王僧辯之徒折簡可致然後朝服濟江入踐皇極辱刻之間大功可立願殿下勿懷匹夫之行督曰卿此策非不善也

南齊書

南朝

昌

然魏人待我厚若遽爲此人將不食吾
餘至是闔城繫虜又失襄陽乃恨不用
德毅之言

梁王僧辯陳霸先奉晉安王方智承制

敬帝諱方智元帝第九子在位二年

乙亥帝蕭譽天定元年○後梁宣春正月梁王啓

始稱帝是爲後梁稱臣於魏傳歸琮二主至陳後主禎明元年爲隋所滅

齊遣梁貞陽侯淵明還梁稱帝以兵納之

二月梁王方智立自尋陽入建康卽梁王位

夏五月梁王僧辯奉淵明歸建康以梁王

方智爲太子秋九月梁陳霸先殺王僧辯

廢淵明冬十月復立方智稱藩於齊淵明尋卒

丙子太元元年春正月魏初建六官以宇文泰

爲大冢宰

初泰以漢魏官繁命蘇綽及尚書令盧辯依周禮定六官至是行之

夏六月齊大治宮室

齊主嗜酒淫佚肆行狂暴典御丞李集
面諫比之桀紂齊主令縛置流中久之
引出謂曰吾何如桀紂集曰彌不及矣
又令沈之引出更問如此數回集對如
初齊主大笑曰天下有如此癡人方知
龍逢比干未是俊物遂釋之頃之入見
似有所諫
竟斬之

冬十月魏太師大冢宰安定公宇文泰卒

世子覺嗣

泰性質素明達政事崇儒好古
凡所施設皆依倣三代而爲之

十二月魏太師覺自爲周公

通鑑要卷十

建創馬父一

馬皇

通鑑纂要卷十一

正編

雲間

姚培謙平山

同錄

張景星二銘

同學陸 錦闇亭參閱

陳紀

姓陳氏漢陳寔後都建康凡五主得年三十有二○附周齊

高祖武帝

諱霸先字興國在位三年

丁丑

二年○陳永定元年○周愍帝宇文覺元年明帝毓元年○是歲西魏亡

周代春正月魏周公覺稱天王廢魏主爲宋

公中山公宇文護自爲大司馬護尋弒宋公稱冢宰

秋九月梁丞相霸先自爲相國封陳公○

周冢宰護弒其君覺立寧都公毓覺庶兄

冬十月梁陳公霸先進爵爲王遂稱皇帝

廢梁主爲江陰王尋弒之

已卯三年○周武成元年

夏六月周主賜處士韋寶號逍遙公

夏孝寬之兄也志尚夷簡魏周之際十徵不屈太祖重之不奪其志周主禮敬尤厚號曰逍遙公

陳主霸先殂兄子臨川王蒨立

齊主滅元氏之族

齊主盡誅諸元前後死者凡七百二十一人定襄令元景安欲請改姓高氏其從兄景皓曰安有棄其本宗而從人之姓者乎丈夫寧可玉碎何能瓦全景安

以其言白齊主齊主誅
景皓賜景安姓高氏

秋八月周主始稱皇帝

冬十月齊主洋殂太子殷立

世祖文帝諱蒨武帝兄始興王長子在位七年

庚辰天嘉元年○齊主殷乾明元年昭帝演皇建元年夏四月周

冢宰護進毒弑其君毓毓弟魯公邕立

秋八月齊常山王演廢其主殷爲濟南王

而自立

未幾
弑之

冬十二月齊以王晞為侍郎不受

齊主欲以晞為侍郎苦辭不受或勸之
晞曰我少年以來閱人多矣得志少
時鮮不顛覆且吾性實疎緩不堪時務
人主恩私何繇可保萬一披猖求退無
地非不好作要官
但思之爛熟耳

辛巳

二年○周武帝邕保定元
年齊武成帝湛太寧元年

冬十一月齊主演殂弟長廣王湛立

壬午

三年。○齊河清元年。
後梁肅天保元年。

癸未

四年

夏四月

周主養老於太學

周主將視學以太傅燕國公于謹爲三
老仍賜以延年杖遂幸太學謹入門周
主迎拜謹答拜有司設席於中楹太師
護設几謹升席南面憑几而坐大司馬
豆盧寧正舄周主跪立於斧扆之前西面
有司進饌周主跪設醬豆袒割謹食畢
周主跪受爵以醕有司徹周主北面立
而訪道謹起立於席後對曰木受繩則
正后從諫則聖明王虛心納諫以知得
失天下乃安又曰去食去兵信不可去

願陛下守信勿失。又曰：有功必賞，有罪必罰，則為善者日進，為惡者日止。又曰：言行者立身之基。願陛下三思而言，九慮而行。周主再拜受言，謹答拜禮。成而退。○醕，羊進切。酒，漱口也。一日安食。

乙酉

六年。○齊後主

夏四月，齊主湛傳位

於太子緯，自稱太上皇帝。

丙戌

天康元年。○周天和元年。

夏四月，陳主蒨殂。太子

伯宗立。

陳主起自艱難知民疾苦資用務從儉約一夜內刺閨取外事分判者前後相續每雞人伺漏傳更籤於殿中敕送者必投籤於階石之上令鎗然有聲云吾雖眠亦令驚覺○以錐藟物曰刺閨宮中小門也就閨中刺取外事故曰刺閨

廢帝臨海王

諱伯宗文帝嫡長子在位二年

丁亥

光大元年

戊子

二年冬十一月陳安成王頊廢其主伯

宗爲臨海王

高宗宣帝

諱瑒始興王第二子。在位十四年。

己丑

大建元年

春正月陳主瑱立

庚寅

二年。○齊武平元年。

壬辰

四年。○周建德元年。

春三月周主討其太師宇文護殺之。周主親政。

文護殺之。周主親政。

楊素以其父敷守節陷齊。未蒙朝命。申理再三。周主大怒。命斬之。素大言曰。臣事無道天子。死其分也。周主壯其言。贈敷大將軍。諡曰忠壯。拜素爲車騎大將。

軍儀同三司漸見禮遇命素爲詔書下
筆立成詞義兼美周主曰勉之勿憂不
富貴素應聲答曰臣但恐富
貴來逼臣臣無心圖富貴

甲午年六夏五月周廢佛道教毀淫祠

初周主定三教先後以儒爲先至是禁
佛道二教經像悉毀沙門道士盡還俗
諸淫祠非祀典
所載者悉除之

乙未年七春三月周使開府儀同三司伊婁

謙如齊齊人畱之

齊主盛脩宮苑窮極壯麗好自彈琵琶
爲無愁之曲民間謂之無愁天子於華
林園立貧兒村自衣藍縷之服行乞其
間以爲樂寵任女侍中陸令萱侍中穆
提婆等宰制朝政宦官鄧長顗陳德信
等並叅預機權官由財進獄以賄成一
戲之賞動踰巨萬旣而府藏空竭乃賜
郡縣使賣官取直繇是守令競爲貪縱
民不聊生周主謀伐之使謙聘於齊以
觀釁其參軍高遵以情告齊人齊人畱
謙等不遣○令萱官婢
也其子提婆沒爲官奴

夏四月陳焚文錦於雲龍門

丙申

八年。齊隆化元年。

冬十二月周主復伐齊齊

主大敗走晉陽遂奔鄴

丁酉

九年。齊幼主恒承光元年是歲齊亡。

春正月朔齊主

緯傳位於太子恒周師圍鄴緯出走周主

入鄴齊丞相高阿那肱引周師追緯及恒

獲之遂滅齊

封緯爲溫公尋殺之。

戊戌

十年。周宣帝贊宣政元年。

夏六月周主邕殂太

子贇立

己亥

十一年○周靜帝闡大象元年

春二月周主贇傳位

於太子闡自稱天元皇帝

庚子

十二年

夏五月周主贇殂隋公楊堅自

爲大丞相假黃鉞居東宮

堅父忠從周太祖起義關西賜姓普六

茹氏位至柱國大司空隋國公堅襲爵

周主贇卽位以后父徵拜上柱國大司

馬贇殂闡幼冲堅入總朝政拜大丞相

冬十二月周丞相堅自爲相國進爵隋王

加九錫

辛丑

十三年○隋高祖文帝楊堅開皇元年○是歲周亡

春二月隋

王堅稱皇帝

周主遜居別宮廢爲介公尋弑之

秋九月隋鑄五銖錢

初周齊所鑄錢凡四等及民間私錢名品甚衆輕重不等隋主患之更鑄五銖

錢自是錢弊始

一民間便之

壬寅

十四年

春正月陳主顓廔太子叔寶立

後主

諱叔寶宣帝長子在位七年

癸卯

至德元年

甲辰

二年

秋九月隋詔公私文翰並宜實錄

治書侍御史李諤上書曰魏之三祖崇尚文辭江左齊梁其弊彌甚競一韻之奇爭一字之巧連篇累牘不出月露之形積案盈箱惟是風雲之狀故其文日繁其政日亂良由棄大聖之軌模構無用以爲用也詔以其奏頒示四方○三

祖謂曹魏父子孫
武帝文帝明帝

冬十一月陳起臨春結綺望仙閣

陳主起三閣皆以沉檀爲之珠簾寶帳
服玩瑰麗陳主自居臨春張貴妃居結
綺龔孔二貴嬪居望仙以宮人袁大捨
等爲女學士日與尚書孔範散騎王瑳
等十餘人侍宴後庭謂之狎客使諸妃
嬪及女學士與狎客共賦詩采其尤豔
麗者被以新聲其曲有玉樹後庭花臨
春樂等大略皆美諸妃嬪之容色○張
貴妃名
麗華

乙巳三夏五月隋初置義倉

度支尚書長孫平奏令民間每秋家出粟麥一石以下貧富爲差儲之當社以備凶年名曰義倉隋主從之

梁主歸殂太子琮立

秋八月陳主殺其中書通事舍人傅縡

縡上書曰夫人君者恭事上帝子愛下民省嗜欲遠諂佞是以澤被區宇慶流子孫陛下頃來酒色過度小人在側宦豎弄權惡忠直若仇讐視生民如草芥

恐東南王氣自斯而盡矣後主大怒頃
之意稍解遣使謂曰我欲赦卿卿能改
過不對曰臣心如面臣面可改
則臣心可改後主益怒遂賜死

丙午

四年○梁後主
琮廣運元年

丁未

禎明元年○
是歲梁亡

秋九月隋滅梁廢其主

蕭琮爲莒公

戊申

二年春三月隋下詔伐陳

初隋主命太作戰船人請密之隋主曰
吾將顯行天誅何密之有使投其柁於

江曰若彼懼而能改吾復何求至是下詔伐陳○耕音孽伐木餘也

冬十月隋以晉王廣爲淮南行省尚書令行軍元帥帥師伐陳滅之獲其主叔寶

隋軍臨江陳主從容謂侍臣曰王氣在此齊兵三來周師再來無不摧敗彼何爲者邪孔範曰長江天塹限隔南北今日虜軍豈能飛渡邪陳主以爲然故不爲深備奏伎縱酒賦詩不輟隋兵入朱雀門陳主自投於井軍人以繩引之驚其太重及出乃與張貴妃孔貴嬪同束而上爲隋將賀若弼韓擒虎所獲○陳

主至文帝仁壽四年卒景陽井在上
元縣治東北一名胭脂井又名辱井

隋紀

姓楊氏漢太尉震八代孫都陝
西長安縣凡四君得年三十八

自東晉分裂後
至是始混一

高祖文皇帝

諱堅在位
二十四年

巳酉開皇九年春正月晉王廣入建康

元帥長史高頴先入廣使人馳告之令
畱張麗華頴曰昔太公蒙面以斬姐已
此豈可畱斬之廣聞之變色曰昔人云
無德不報我必有以報高公由是恨頴

辛亥十一年春二月以劉曠為莒州刺史

平鄉令劉曠有異政以義理曉諭訟者皆引咎而去獄中草滿庭可張羅高頰薦之故有是命

甲寅十四年秋七月關中旱饑

帝遣左右視民食得豆屑雜糠以獻帝流涕以示羣臣深自咎責為之不御酒肉者暮年

乙卯十五年冬十月以韋世康為荊州總管

世康和靜謙恕爲吏部尚書十餘年時
稱廉平常有止足之志謂子弟曰祿豈
須多防滿則退年不待暮有疾便
辭因懇乞骸骨不許使鎮荊州

丁巳十七年春三月詔諸司論屬官罪聽律
外決杖

帝以所在屬官不敬憚其上事難克舉
茲有是詔又以盜賊繁多命盜一錢以
上皆棄市有數人奴執事而謂之曰爲
我奏至尊自古立法未有盜一錢而死
也而不以聞吾更來而屬無類矣帝
聞乃停此法○奴持也而猶爾汝也

庚申二十年冬十月廢太子勇爲庶人十一

月立晉王廣爲太子

勇率意任情服用侈靡帝戒之曰自古帝王未有好奢侈而能久長者汝當以儉約爲先廣彌自矯飾謀於楊素素贊帝廢勇勇頻請見帝申冤廣遏之不得聞初帝之克陳也天下皆以爲將太平監察御史房彥謙私謂所親曰主上忌刻而苛酷太子卑弱諸王擅權天下雖安方憂危亂其子玄齡亦密言於彥謙曰主上本無功德以詐取天下諸子皆驕奢不仁必自相誅夷今雖承平其亡

可翹足而待高孝基名知人見玄齡嘆
曰僕聞人多矣未見如此郎者異日必
爲偉器恨不見其大成耳見杜如晦謂
曰君有應變之才必任棟梁之重俱以
子孫託之

辛酉二十一年春正月改元仁壽

癸亥三年秋九月龍門王通獻策不報

通詣闕獻太平十二策帝不能用罷歸
通遂教授於河汾之間累徵不起楊素
勸之仕通曰通有先人之敝廬足以蔽
風雨薄田足以供養粥讀書談道足以

自樂願明公正身以治天下使時和年
豐通也受賜多矣大業末卒於家門人
諡曰文中子○餐通
作饋厚曰饋希曰粥

甲子四年秋七月太子廣弒帝於大寶殿而

自立遂殺故太子勇流尚書柳述侍郎元

巖於嶺南

帝寢疾僕射楊素與述巖皆入閣侍疾
帝所寵陳夫人旦出更衣爲太子所迫
拒之得免帝怪其神色有異問故夫人
泣然曰太子無禮帝恚抵牀曰畜生何

足付大事乃呼述巖召故太子勇述巖
出閣爲敕書素問以白太子矯詔執述
巖繫獄令右庶子張衡入殿侍疾盡遣
後宮出就別室俄而帝崩哺後太子封
小金合遣使者賜夫人夫人以爲鴆毒
懼甚發之乃同心結也夫人恚而却坐
不肯致謝諸宮人共逼之乃拜使者其
夜太子烝焉明日發喪卽位矯稱高祖
之詔賜故太子勇死縊殺之除述巖
名徙之嶺南○陳夫人陳宣帝女

冬十一月帝如洛陽

時以洛陽爲東京後改爲東都

煬皇帝

諱廣小字阿廢文帝第二子在位十三年

丑乙 大業元年春三月命楊素營東京宮室

自長安至江都置離宮四十餘所遣黃門侍郎王弘等往江南造龍舟及雜船數萬艘又築西苑周二百里其內爲海羅十餘里爲方丈蓬萊諸山臺觀宮殿葉綴於枝條色渝則易以新沼內亦剪綵爲菱荷菱茨乘輿臨幸則去冰而布之月夜從宮女數千騎遊西苑作清夜遊曲於馬上奏之

秋八月帝如江都

帝御龍舟挽士八萬餘人皆以錦綵爲袍舳舻相接旌旗蔽野所過州縣五百里內皆令獻食多者一州至百輦極水陸珍奇後宮厭飫將發之際多棄埋之○舳舻船後持舵處艫船頭刺櫂處輦同輿

丙寅二年春二月新作輿服儀衛

袁晁畫日月星辰皮弁以漆紗爲之大抵務爲華盛課州縣送羽毛民捕之無遺類烏程有高樹上有鶴巢民欲取之不可乃伐其根鶴恐傷其子自拔髦毛投於地時人或稱以爲瑞

秋七月始建進士科

後世進士科始此

丁卯三年秋八月帝至金河幸啓民可汗帳

帝北巡突厥可汗來迎奉觴上壽帝大悅賦詩曰呼韓頓顙至屠耆接踵來何如漢天子空上單于臺○可汗夷狄君長之號匈奴俗謂賢曰屠耆

冬十月以裴矩爲黃門侍郎經略西域

西域諸胡多至張掖交市矩知帝好遠略商胡至者矩誘訪諸國山川風俗撰西域圖記三卷入朝奏之因盛言胡中多諸珍寶帝於是慨然將通西域以矩

爲黃門侍郎復使至張掖引致諸胡陷之以利勸令入朝自是西域諸胡往來相繼所經郡縣糜費以萬萬計卒令中國疲弊以至於亡矩倡之也

巳巳五年冬十一月殺司隸大夫薛道衡

道衡以才學有盛名上高祖頌帝不悅曰此魚藻之義也拜司隸大夫會議新令久不決道衡謂人曰向使高顙不死令決當久有人奏之帝怒縊殺之○小雅魚藻篇所以刺幽王而思武王也顙爲帝所殺

庚午六年春正月諸蕃來朝陳百戲於端門

以示之

帝以諸蕃酋長畢集洛陽陳百戲於端門街執絲竹者萬八千人自昏達旦終月而罷所費鉅萬自是歲以爲常諸蕃請入豐都市交易許之先命整飾店肆盛設帷帳珍貨充積胡客過酒食店悉令邀入醉飽不取其直給之曰中國豐饒酒食例不取值胡客皆驚嘆其黠者頗覺之見其繒帛纏樹曰中國亦有貧者衣不蓋形何如以此物與之纏樹何爲市人慚不能答

三月以王世充領江都宮監

世充西域胡人姓支氏父收幼從母嫁王氏因冒其姓世充性譎詐頗涉書傳好兵法習律令帝數幸江都世充能伺候顏色雕飾池臺奏獻珍物由是有寵

冬十二月穿江南河

自京口至餘杭八百餘里欲東巡會稽也

徵高麗王元入朝不至

辛未七年春二月帝自將擊高麗夏四月至

臨朔宮徵天下兵會涿郡

詔討高麗敕幽州總管元弘嗣往東萊海口造船官吏督役晝夜立水中腰下

生疽死者什三四。又敕河南淮南江南造戎車五萬乘。送高陽。供載衣甲幔幕。令兵士自挽之。發河南北民夫以供軍。須江淮以南民犬及船。運黎陽及洛口。諸倉米至涿郡。舳舻千里。往還常數十萬人。死者相枕。天下騷動。明年擊高麗。大敗而還。大軍凡二十萬。五千及還。惟二千七百人。

起冬十月王薄張金稱高士達竇建德等兵

薄鄒平民擁衆據長白山。自稱知世郎。言事可知矣。又作無向遼東浪死歌。以

相感動避征役者多歸之建德漳南人少尚氣俠胆力過人會募人征高麗建德以選爲二百人長乃集無賴少年得數百人使同縣孫安祖將之入高雞泊中爲羣盜金稱鄒人聚衆河曲蓇人高士達聚衆於清河自是所在羣盜蜂起攻陷城邑九年三月齊郡丞張須陁擊薄等破之

壬申
八年秋九月殺張衡

初帝營汾陽宮衡諫曰比年勞役繁多百姓疲弊願稍加抑損帝意不平謂侍臣曰衡自謂由其計畫令我有天下也乃出爲榆林太守久之除名爲民衡旣

放廢帝每令親人覘之及還自遼東衛
妾告衛怨望謗訕詔賜自盡臨死大言
曰我爲人作何等事而望久
活監刑者塞耳促令殺之

癸酉

九年春三月帝復自將擊高麗命越王

侗畱守東都夏六月楚公楊玄感起兵黎

陽圍東都秋七月玄感引兵趣潼關八月

玄感敗死

玄感素之子驍勇便騎射好讀書海內
知名之士多與之游蒲山公李密弼之

曾孫少有才略爲左親侍帝謂宇文述曰左仗下黑色小兒瞻視異常勿令宿衛述乃諷密使稱病自免密遂屏人事專務讀書常乘黃牛讀漢書楊素遇而異之謂玄感等曰汝等不及也由是玄感與爲深交及素卒玄感以朝政日紊潛謀作亂至是帝命玄感於黎陽督運遂勒兵部分詐稱來獲兒反引兵向洛陽帝聞玄感反書至引蘇威入帳中謂曰此兒聰明得無爲患威曰玄感龔疎必無所慮但恐因此寢成亂階耳乃引軍還遣宇文述屈突通等擊玄感玄感敗死殺玄感黨三萬餘人在死者大半玄感所善文士王胄坐徙邊亡命捕得

誅之帝善屬文不欲人出其右薛道衡
死帝曰更能作空梁落燕泥否曹姓帝
誦其佳句曰庭草無人隨意緣復能作
此語耶帝自負才學每驕天下之士嘗
謂侍臣曰天下皆謂朕承藉餘緒而有
四海設令朕與士大夫高選亦當爲天
子矣

甲戌十年春二月徵天下兵伐高麗三月帝

如涿郡秋七月次懷遠鎮高麗遣使請降

時天下已亂所徵兵多失期不至高麗
亦困弊遣使乞降帝乃班師仍徵高麗

通鑑纂要卷五十一
王元入朝

元竟不至

乙亥十一年春三月孔雀集朝堂百官稱賀

高德儒等奏

爲鸞故賀

秋八月帝巡北邊突厥始畢可汗入寇帝
入鴈門始畢圍之九月乃解

詔募兵李淵子世民年十六應募隸屯
衛將軍雲定興謂定興曰虜敢圍吾天
子者以爲無援故也今宜先後吾軍爲
數十里使其晝見旌旗夜聞鉦鼓以爲

援兵大至，不擊而走之。定興從之。
始畢遂引去。○始畢，啓民之子。

丙子

十二年。○楚帝林士弘太平元年。

秋七月，帝如江都。

江都新作龍舟成，送東都。宇文述勸幸江都，從之。殺諫者任宗。崔民象王愛仁。

冬十月，翟讓、李密起兵攻滎陽。張須陁擊

之，敗死。

密之亡也，因乏，變姓名，聚徒教授郡縣。疑而捕之，亡去，抵雍邱。王秀才家，復爲人所告。帝令捕之，遣兵圍秀才宅。值密出外，獲免。讓、韋城人，爲東郡法曹，坐事。

當斬亡命於瓦岡爲羣盜同郡單雄信
徐世勣皆從之聚衆至萬餘人密亦歸
讓有李玄英者自東都逃來經歷諸賊
訪密云斯人當代隋家人問其故玄英
言比來民間謠曰桃李子皇后統楊州
宛轉花圍裏莫浪語誰道許桃李子謂
逃亡者李氏子也莫浪語誰道許者密
也旣與密相遇遂委身事之密說讓等先
攻滎陽帝徙須陁爲滎陽通守以討之
密畫策用伏殺須陁河南郡縣俱喪氣

十二月鄱陽林士弘稱楚帝據江南

建元
太平

以李淵爲太原留守

恭帝

諱侑文帝孫元德太子子在位二年

丁丑

十三年○恭帝義寧元年竇建德丁丑元年魏公李密元年定楊可汗劉

武周天興元年梁王梁師都永隆元年秦主薛舉秦興元年梁王蕭銑鳴鳳元年

春正月竇建德稱長樂王

後改國號夏秦王世民擊斬之

二月馬邑校尉劉武周朔方郎將梁師都

各據郡起兵

收兵萬餘人附於突厥

翟讓李密據興洛倉擊敗東都兵讓推密

稱魏公略取河南諸郡

密移傲郡縣數煬帝十罪曰罄南山之竹書罪無窮決東海之波流惡難盡

三月突厥立劉武周爲定楊可汗

武周襲破樓煩郡進取汾陽宮獲隋宮人以賂突厥始畢可汗始畢以馬報之兵勢益振又攻陷定襄突厥立武周爲定楊可汗武周卽皇帝位改元

梁師都取雕陰弘化延安等郡自稱梁帝
夏四月金城校尉薛舉起兵隴西自稱西

秦霸王

尋稱帝舉卒子仁
果嗣後降唐斬之

五月李淵起兵太原

初淵娶於竇毅生四男建成世民玄霸
元吉一女適柴紹世民聰明勇決識量
過人見隋室方亂陰有安天下之志晉
陽令劉文靜見而異之謂晉陽宮監裴
寂曰此非常人豁達類漢高神武同魏
祖年雖少命世才也文靜坐與李密連
昏繫太原獄世民就省之與議大事文
靜曰今主上南巡密圍逼東都羣盜始
以萬數當此之時有真主驅駕而用之
取天下如反掌耳太原豪傑收集可得

十萬人尊公所將之兵復且數萬以此
乘虛入關號令天下不過半年帝業成
矣世民笑曰君言正合我意乃乘間說
淵曰主上無道大人若守小節下有寇
盜上有嚴刑危亡無日不若順民心興
義兵轉禍爲福此天授之時也淵大驚
曰汝安得爲此言明日世民復說淵淵
乃歎曰吾一夕思汝言亦大有理今日
破家亡軀由汝化家爲國亦由汝矣先
是寂私以晉陽宮人侍淵至是淵從寂
飲酒酣寂曰二郎欲舉大事正爲寂以
宮人侍公恐事覺并誅耳淵曰事已如
此正須從之淵乃命世民與文靜等各
募兵旬日間近萬人密遣使召建成元

吉於河東。紹於長安。○二郎指世民。

六月李淵遣世子建成及世民擊西河郡。

拔之。斬郡丞高德儒。

世民數德儒曰。汝指野鳥爲鸞。以欺人主。取高官。吾興義兵。正爲誅佞人耳。遂斬之。白餘不戮一人。秋毫無犯。遠近大悅。淵喜曰。以此行兵。雖橫行天下可也。遂定入關之計。

秋七月李淵引兵至霍邑。代王侑遣郎將

宋老生將軍屈突通將兵拒之

淵以子元吉畱守晉陽宮自帥甲士三萬至西河慰勞吏民賑贍貧乏隋遣兵拒淵會積雨淵不得進淵以書招李密密自恃兵強欲爲盟主復書曰所望左提右挈戮力同心執子嬰於咸陽殪商辛於牧野淵得書笑曰密妄自矜大非折簡可致不如卑辭推獎以驕其志使爲我塞成臯之道綴東都之兵我得專意西征俟關中平定徐觀蚌鷸之勢以收漁人之功未爲晚也乃復書曰天生蒸民必有司牧當今爲牧非子而誰唯弟早膺圖籙以寧兆民宗盟之長屬籍

見容後封於唐斯榮足矣密得書甚喜
曰唐公見推天下不足定矣雨久不止
淵軍中乏糧欲北還世民曰今禾菽被
野何憂乏糧老生輕躁一戰可擒本興
大義以救蒼生當先入咸陽號令天下
今遇小敵遽已班師恐從義之徒一朝
解體淵不聽促令引發世民號哭諫淵
乃悟追軍復還旣而太原運糧亦至淵
與老生戰斬之遂取霍邑

武威司馬李軌起兵河西自稱涼王秋九
月李密遣徐世勣取黎陽倉

密襲破黎陽倉據之開倉恣民就食浹旬間得勝兵三十餘萬秦山道士徐洪客獻書於密以爲大衆久聚恐米盡人散勸密乘進取之機因士馬之銳沿流東指直向江都執取獨夫號令天下密壯其言以書招洪客竟不出莫知所之

李淵畱兵圍河東自引軍西

時河東未下淵畱諸將圍河東自引軍而西濟河遣世民徇渭北世民所至吏民及羣盜歸之如流隰城尉房玄齡謁世民於軍門世民一見如舊識署記室參軍引爲謀主玄齡罄心竭力知無不爲淵至長安諸軍皆集淵命各依壘壁

毋得人村落侵
暴遂進圍城

冬十月蕭銑起兵巴陵自稱梁王銑羅川令也梁

後巴陵校尉董景珍等謀叛推
爲主後稱帝唐李靖擊降之


十一月李淵克長安

淵與民約法十二條悉除隋苛禁馬邑
郡丞李靖素與淵有隙淵收靖將斬之
靖大呼曰公興義兵欲平暴亂乃以私
怨殺壯士乎世民爲之固請乃捨之世
民因召置幕府靖少負志氣有文武才
略其舅韓擒虎每撫之曰可與言將帥


之略者獨
此子耳

李淵立代王侑爲皇帝尊帝爲太上皇
淵自爲大丞相封唐王以建成爲唐王世
子世民爲秦公元吉爲齊公

通鑑肇要卷十一







通鑑
臨
手
要

DS
735
A2Y36
1761
v.7-8